



**PWYLLGOR CYNGOR RHONDDA CYNON TAF  
PWYLLGOR CRAFFU - MATERION YR HINSAWDD, GWASANAETHAU RHENG FLAEN A  
FFYNIANT**

Cofnodion o gyfarfod rhithwir y Pwyllgor Craffu - Materion yr Hinsawdd, Gwasanaethau Rheng Flaen a Ffyniant a gynhaliwyd Dydd Mercher, 22 Tachwedd 2023 am 5.00 pm.

**Y Cyngorwyr Bwrdeistref Sirol – Roedd y Aelodau Pwyllgor Craffu - Materion yr Hinsawdd, Gwasanaethau Rheng Flaen a Ffyniant canlynol yn bresennol ar-lein:-**

Y Cyngorydd C Middle (Cadeirydd)

Y Cyngorydd G L Warren    Y Cyngorydd J Barton  
Y Cyngorydd E L Dunning    Y Cyngorydd G Holmes  
Y Cyngorydd W Hughes    Y Cyngorydd G Jones  
Y Cyngorydd A O Rogers    Y Cyngorydd W Treeby  
Y Cyngorydd R Yeo

**Swyddogion oedd yn bresennol**

Mr P Dukes, Blaen Swyddog Materion Lleihau Carbon  
Mr S Gale, Cyfarwyddwr Materion Ffyniant a Datblygu  
Mr S Humphreys, Pennaeth y Gwasanaethau Cyfreithiol  
Mr P Mortimer, Rheolwr Cyllid a Gweithredu  
Mr D Powell, Cyfarwyddwr Materion Eiddo'r Cyngor  
Mr A Roberts, Head of Energy & Carbon Reduction  
Mr A Stone, Head of Flood Risk Management and Strategic Projects  
Mr S Williams, Pennaeth Materion Buddsoddi Strategol

**Y Cyngorwyr Bwrdeistref Sirol yn bresennol**

Y Cyngorydd C Leyshon

**Ymddiheuriadu am absenoldeb**

Y Cyngorydd P Binning    Y Cyngorydd V Dunn  
Y Cyngorydd P Evans    Y Cyngorydd G O Jones

**22 Croeso**

Croesawodd y Cadeirydd yr Aelodau, Swyddogion a'r Aelodau o'r Cabinet i'r cyfarfod.

**23 Ymchwil a Chraffu**

Cyfeiriodd y Swyddog Ymchwil a Materion Craffu'r Aelodau at y cyfleusterau ymchwil sydd ar gael i Aelodau yn Uned Busnes y Cyngor. Rhoddwyd gwybod i Aelodau os oes gyda nhw unrhyw ymholiadau penodol, mae modd iddyn nhw e-bostio [Craffu@rctcbc.gov.uk](mailto:Craffu@rctcbc.gov.uk).

## 24 Ymddiheuriadau

Daeth ymddiheuriadau am absenoldeb oddi wrth Gynghorwyr y Fwrdeistref Sirol V. Dunn, P. Binning, P. Evans a Geraint Jones.

## 25 Datgan Buddiant

Yn unol â'r Cod Ymddygiad, doedd dim datganiadau o fuddiant ynglŷn â'r agenda.

## 26 Cofnodion

Cafodd cofnodion y cyfarfod ar 18 Hydref 2023 eu cadarnhau'n rhai cywir.

## 27 Ymgynghoriadau

Cyfeiriodd y Swyddog Ymchwil a Materion Craffu'r Aelodau at y dolenni ymgynghori sydd ar gael trwy wefan 'Craffu RhCT'. Cafodd Aelodau eu hatgoffa bod gwybodaeth yn cael ei rhannu mewn perthynas ag ymgynghoriadau priodol i'w trafod gan y Pwyllgor bob mis a'i diweddarau bob pythefnos.

## 28 Adroddiad ar yr Ymgynghoriad Cyhoeddus Statudol ar gyfer Adolygiad yr Awdurdod o'r Strategaeth Leol ar gyfer Rheoli Perygl Llifogydd a'r Cynllun Gweithredu

Cyflwynodd y Pennaeth Rheoli Perygl Llifogydd ei adroddiad i'r Aelodau er mwyn rhoi cyfle iddyn nhw drafod yr ymatebion i'r ymgynghoriad statudol â'r cyhoedd mewn perthynas â'r Strategaeth Leol Ddiwygiedig Ar Gyfer Rheoli Perygl Llifogydd a'r Cynllun Gweithredu (Y Cynllun Rheoli Perygl Llifogydd yn flaenorol), fel sy'n ofynnol dan Adran 10 o Ddeddf Rheoli Llifogydd a Dŵr (2010).

Yn dilyn y cyflwyniad, cafodd Aelodau gyfle i graffu ar yr adroddiad a gofyn cwestiynau.

Nododd Aelod fod nifer o bobl wedi bwrw golwg ar y dudalen ar wefan y Cyngor ond dim ond nifer fach o drigolion sydd wedi cwblhau'r ymgynghoriad. Holodd yr Aelod pam bod hyn wedi digwydd a beth allai'r Cyngor ei wneud er mwyn annog pobl i gymryd rhan. Nododd y Pennaeth Rheoli Perygl Llifogydd fod hyn yn ymgynghoriad statudol ac mae rhaid cynnwys grwpiau penodol. Ychwanegodd fod manylion yr ymgynghoriad wedi cael eu rhannu ar y cyfryngau cymdeithasol ddwywaith yr wythnos. Pwysleisiodd ei bod hi'n gadarnhaol bod pobl yn edrych ar y dudalen, mae modd ystyried hyn yn ganiatâd goddefol. Nododd y Pennaeth Rheoli Perygl Llifogydd fod yr ymatebion a dderbyniwyd yn dda iawn a byddai modd cynyddu nifer y bobl sy'n cymryd rhan yn y dyfodol drwy ymgysylltu â'r Garfan Gyfathrebu.

Gofynnodd y Cadeirydd a oedd y Cyngor wedi ymgysylltu â grwpiau i bobl anabl/gwirfoddolwr yn y gymuned/elusennau ac ati. Cyfeiriodd y Pennaeth

Rheoli Perygl Llifogydd at Atodiad B, sy'n nodi'r ymgynghorai statudol y mae angen eu cynnwys, yna cafodd staff, Cyngorwyr, Trafnidiaeth Cymru ac ati eu targedu. Nodwyd nad oedd grwpiau demograffig wedi cael eu targedu, ond cafodd ei anelu at y cyhoedd. Gofynnodd y Cadeirydd a oedd y Cyngor wedi ymgynghori â'r Weinyddiaeth Amddiffyn. Nododd y Pennaeth Rheoli Perygl Llifogydd nad yw'r Weinyddiaeth Amddiffyn yn ymgynghorai statudol, fodd bynnag nododd hefyd nad yw hwn yn gynllun ymateb mewn argyfwng, dyma fesur sydd wedi'i gynnwys yn y strategaeth.

Holodd Aelod arall a yw'r cyhoedd yn ymgynghorai statudol a chadarnhawyd eu bod nhw'n cael eu hystyried yn ymgynghorai statudol yn rhan o'r broses. Holodd yr Aelod a oedd y garfan wedi manteisio i'r eithaf ar y cyfryngau cymdeithasol fel modd o gyfathrebu. Cyfeiriodd y Pennaeth Rheoli Perygl Llifogydd at Atodiad A a'r poster a gafodd ei ddefnyddio. Nodwyd bod y neges yma wedi'i rhannu ar y cyfryngau cymdeithasol ddwywaith yr wythnos yn ystod yr ymgynghoriad chwe wythnos.

Holodd Aelod arall sut bydd y cynllun yma'n helpu'r rheiny sydd wedi'u heffeithio gan lifogydd a'r rheiny a allai gael eu heffeithio gan lifogydd yn y dyfodol. Nododd y Pennaeth Rheoli Perygl Llifogydd mai sail y strategaeth yw deall y perygl a rhoi cynllun ar waith mewn modd effeithiol. Mae'r strategaeth yn nodi'r 5 egwyddor sydd wedi'u pennu gan Lywodraeth Cymru yn ogystal ag amcanion a mesurau sydd eisoes wedi'u cynnwys yn y strategaeth. Gofynnodd yr Aelod a oedd gan y trigolion y pecynnau gwybodaeth fel bod modd iddyn nhw baratoi'n well. Nododd y Swyddog fod y tudalennau ar wefan Rheoli Perygl Llifogydd bellach yn fyw a bydd y rhain yn dod yn rhan o'r trefniadau cynllunio ar gyfer argyfwng. Pwysleisiwyd bod y rhan honno o'r strategaeth yn cynnwys codi ymwybyddiaeth ymhlith y cyhoedd. Holodd yr Aelod pa adnoddau sydd ar waith ar gyfer y bobl hynny sydd ddim yn defnyddio'r rhyngwyd. Rhoddodd y Swyddog wybod bod rhan o'r strategaeth yn cynnwys datblygu strategaeth gyfathrebu a fydd yn cynnwys estyn allan i grwpiau gwahanol. Dyma gynlluniau gweithredu sydd wedi'u cynnwys yn y strategaeth. Holodd y Cadeirydd a gafodd y gwaith ymgysylltu ei gynnal wyneb yn wyneb, ond cadarnhaodd y Swyddog fod y gwaith ymgysylltu wedi'i gynnal ar-lein, ond roedd modd i'r trigolion ofyn am gopi papur.

Yn dilyn trafodaeth, **PENDERFYNODD** Aelodau:

- i. Trafod a chraffu ar gynnwys yr adroddiad ynghyd â'r adroddiad am yr ymgynghoriad â'r cyhoedd sydd wedi'i gynnwys yn Atodiad 1.
- ii. Argymhell ymgynghoriad wedi'i dargedu yn ystod y broses o gyflwyno'r Strategaeth Leol Ar Gyfer Rheoli Perygl Llifogydd a'r Cynllun Gweithredu ar gyfer mesurau a chymau gweithredu sy'n benodol i'r gymuned, fel sydd wedi'u nodi yn Amcan 9, Mesur 3 a Chymau Gweithredu A6, A7 ac A8.

## 29 Strategaethau Canol Tref RhCT

Cyflwynodd y Cyfarwyddwr Materion Ffyniant a Datblygu'r adroddiad cyn rhoi cyfle i'r Pennaeth Materion Adfywio annerch yr Aelodau. Gofynnwyd i'r Aelodau drafod y cynnydd sydd wedi'i wneud o ran datblygu a chyflwyno strategaethau adfywio canol trefi a chynlluniau creu lleoedd yn Rhondda Cynon Taf.

Yn dilyn hyn, cafwyd trafodaeth. Holodd y Cadeirydd pa gorgyffwrdd sydd rhwng Cynghorau Tref a Chynghorau Cymuned gan ystyried nad oes Cyngor Tref yng Nghwm Rhondda. O'r holl drefi sydd â strategaeth, cadarnhaodd y Pennaeth Materion Adfywio mai dim ond Pontypridd sydd â Chyngor Tref a bod partneriaeth gadarn wedi'i sefydlu gyda Chyngor Tref Pontypridd sydd wedi ein galluogi ni i gryfhau'r broses ar gyfer cyflwyno'r strategaeth.

Tynnodd Aelod sylw at y broblem o ddigartrefedd gan nodi bod modd i hyn effeithio ar nifer y bobl sy'n ymweld â chanol trefi. Holodd Aelod pa gamau y mae'r Cyngor wedi'u cymryd i fynd i'r afael â hyn ac a ydyn nhw'n gweithio mewn partneriaeth â'r Garfan Materion Tai. Holodd yr Aelod a yw Cynlluniau Tai Cymdeithasol wedi'u cynnwys yn rhan o'r cynlluniau ar gyfer y trefi. Cadarnhaodd y Pennaeth Materion Adfywio eu bod nhw wedi bod yn edrych ar anghenion tai yn rhan o'r dull strategol, ac aeth ati i gadarnhau bod y garfan yn gweithio'n agos gyda'i chydweithwyr yn y garfan materion tai a'r cymdeithasau tai. Cyfeiriodd y Cadeirydd at ardal Tonypany, gan nodi bod dau ddatblygiad mawr eisoes yn yr ardal yma a holodd a fydd y Cyngor yn blaenoriaethu adeiladau presennol cyn rhoi caniatâd ar gyfer datblygiadau cymdeithasol eraill yng nghanol trefi. Rhoddodd y Pennaeth Materion Adfywio wybod bod angen sicrhau cydbwysedd ar gyfer pob canol tref a bydd y strategaeth yn adlewyrchu'r angen ym mhob ardal. Cytunodd Aelod arall a nododd fod modd rhannu eiddo'n tai cymdeithasol ac eiddo masnachol. Nododd yr Aelod y duedd o siopa mewn parciau manwerthu gan nodi bod angen i ni edrych ar gysylltiadau trafndiaeth er mwyn annog pobl i ymweld â chanol trefi. Cytunodd y Cadeirydd a nododd bwysigrwydd y bensaernïaeth unigryw yn ein trefi.

Roedd y Cyfarwyddwr Materion Ffyniant a Datblygu wedi cydnabod y pwyntiau yma a nododd fod pwrpas ein trefi a sut maen nhw'n cael eu defnyddio wedi newid. Pwysleisiodd y Cyfarwyddwr ei bod hi'n bwysig ein bod ni'n newid y ffordd rydyn ni'n edrych ar ein canol trefi a'u bod nhw'n cael eu hystyried yn hybiau cymdeithasol ar gyfer ein cymunedau. Rhaid i ni hefyd edrych ar yr hyn sydd ei angen ar bobl. Nododd y Cadeirydd hefyd ein bod ni wedi gweld cynnydd yn nifer y bobl sy'n ymweld â'n canol trefi, yn enwedig ers y pandemig.

Gofynnodd Aelod arall am y camau nesaf mewn perthynas â thref Tonypany, a hefyd a yw'r garfan yn gweithio gyda'r heddlu mewn perthynas ag ymddygiad gwrthgymdeithasol yn ein trefi a'r effaith y mae modd i hyn ei chael ar nifer y bobl sy'n ymweld â'r dref. Yn dilyn y gwaith sydd wedi'i gyflawni'n ddiweddar i lunio strategaeth o'r gwaelod i fyny ar gyfer Aberdâr yn ogystal â'r gwaith ymgysylltu â rhanddeiliaid allweddol, rhoddodd y Cyfarwyddwr wybod mai Tonypany fydd y dref nesaf i elwa o strategaeth. O ran ymddygiad gwrthgymdeithasol, mae'r Heddlu yn ymgynghorai allweddol yn rhan o'n strategaethau ac mae'r garfan yn gweithio'n agos â'r Swyddog Heddlu - Cynllunio i Atal Troseddu mewn perthynas ag adfywio canol trefi. Mae'r broses ddylunio'n cynnwys cydweithio â'r heddlu. Pwysleisiodd y Cadeirydd fod ymddygiad gwrthgymdeithasol yn cyflwyno heriau sylweddol yng nghanol trefi.

Cynhaliwyd trafodaethau pellach a nododd Aelod y dylid blaenoriaethu trafndiaeth gyhoeddus. Roedd Cyfarwyddwr y Gwasanaethau Rheng Flaen wedi cydnabod bod hyn yn broblem a nododd fod gweithredwyr bysiau yn wynebu problemau o ran denu a chadw gyrwyr, fodd bynnag, mae'r Cyngor yn gweithio i sicrhau bod y ddarpariaeth yma'n parhau.

Roedd Aelod arall wedi canmol y gwaith sy'n cael ei gynnal gan y Cyngor mewn

canol trefi. Holodd Aelod a yw Mannau Gwyrdd a Newid Hinsawdd wedi cael eu hystyried yn rhan o'r strategaeth. Rhoddodd y Pennaeth Materion Adfywio wybod bod cyfres o ymyraethau yn cael eu cyflwyno mewn perthynas â manau gwyrdd a bydd y rhain yn cael eu cynnwys wrth i Gyngor RhCT lunio strategaethau canol trefi yn y dyfodol.

Yn dilyn trafodaeth, **PENDERFYNWYD**:-

- i. Nodi'r cynnydd sydd wedi'i wneud o ran datblygu a chyflwyno strategaethau adfywio canol trefi a chynlluniau creu lleoedd yn Rhondda Cynon Taf.
- ii. Darparu diweddariadau pellach i'r Pwyllgor Craffu - Materion yr Hinsawdd, Gwasanaethau Rheng Flaen a Ffyniant.

### 30 Cynllun Gweithredu - Datgarboneiddio

Cyflwynodd Cyfarwyddwr Eiddo'r Cyngor ei adroddiad i Aelodau'r Pwyllgor Craffu – Materion yr Hinsawdd, Gwasanaethau Rheng Flaen a Ffyniant. Roedd yr adroddiad yn trafod y cynnydd sydd wedi'i wneud yn rhan o'r Strategaeth Ddatgarboneiddio Gorfforaethol a'r Cynllun Gweithredu cysylltiedig, yn dilyn mabwysiadu'r Strategaeth yn ystod cyfarfod [Is-bwyllgor y Cabinet ar Faterion yr Hinsawdd ar 23 Mawrth 2023](#).

Yna rhoddodd y Pennaeth Materion Ynni a Lleihau Carbon a'r Prif Swyddog Lleihau Carbon ddiweddariad i'r Aelodau gan ddefnyddio cyflwyniad Powerpoint.

Yn dilyn hyn, cafodd Aelodau gyfle i ofyn cwestiynau.

Holodd y Cadeirydd pa effaith y mae'r toriadau a'r cyfyngiadau o ran y gyllideb yn ei chael ar y cynllun datgarboneiddio. Gofynnodd y Cadeirydd fod diweddariadau rheolaidd yn cael eu rhannu â'r Pwyllgor Craffu. Rhoddodd y Cyfarwyddwr wybod bod cyfrifo cost carbon niwtral yn ddarn o waith sy'n mynd rhagddo o hyd, dylai'r gwaith yma gael ei gwblhau yn gynnar yn y flwyddyn ariannol nesaf. Pwysleisiwyd hefyd bod y garfan wedi bod yn llwyddiannus wrth sicrhau grantiau i dalu am brosiectau a swyddi ac ati.

Gofynnodd y Cadeirydd gwestiwn ynglŷn â'r broses gaffael, gan ofyn sut mae'r Cyngor yn bwriadu sicrhau cefnogaeth cwmnïau lleol o ran cyfrannu at y cynllun carbon niwtral. Cyfeiriodd Cyfarwyddwr Eiddo'r Cyngor at ddatblygu cyfrifiannell carbon y mae modd i gontractwyr ei defnyddio i sefydlu beth yw eu hallyriadau carbon gwirioneddol. Nododd y Cyfarwyddwr fod pob £1 miliwn sy'n cael ei wario ar brosiectau yn cael ei luosi â ffactor carbon er mwyn cyfrifo'r allyriadau honedig, a hynny'n rhan o ganllawiau Llywodraeth Cymru i gyfrifo Ôl-troed Carbon y Cyngor. Y gobaith yw y bydd y ffigurau yma'n fwy manwl gywir yn y dyfodol pan fydd y Cyngor yn annog contractwyr i ddefnyddio'r pecyn cymorth a'r gyfrifiannell allyriadau. Rhoddodd y Prif Swyddog Lleihau Carbon wybod bod y dull yma wedi'i ddatblygu ar gyfer Busnesau Bach a Chanolig yn ogystal â chwmnïau mawr.

Cafwyd trafodaeth a holodd Aelod faint o arian y mae'r Cyngor yn ei arbed drwy ddefnyddio Paneli Solar. Rhoddodd y Prif Swyddog Lleihau Carbon wybod bod y ffigurau yma ar gael a byddan nhw'n cael eu rhannu ag Aelodau yn

dilyn y cyfarfod.

Gofynnodd y Cadeirydd a yw'r Cyngor yn gweithio gyda'r Grid Cenedlaethol a Phartneriaid i gyflawni'r cynllun. Rhoddodd y Prif Swyddog Lleihau Carbon wybod bod y Cyngor yn gweithio gyda'i bartneriaid a'r dull mwyaf effeithlon o dynnu ynni yw eich stopio chi rhag tynnu ynni o'r Grid. Rhoddodd y Swyddog wybod bod modd rhannu'r adroddiad incwm blyneddol ag Aelodau.

Cafwyd trafodaeth bellach a holodd Aelod a yw'r Cyngor yn gweithio gydag adeiladwyr lleol i'w hannog nhw i wneud gymaint ag sy'n bosibl. Rhoddodd y Cyfarwyddwr wybod bod prosiect yn cael ei gynnal ar hyn o bryd ym Mhontypridd sy'n cynnwys gosod Paneli Solar, mewn rhai achosion caiff paneli solar eu defnyddio ond nid oes modd gweld y paneli solar gan eu bod nhw'n rhan o'r to llechi. O safbwynt cynllunio, mae paneli solar effeithlon o ran ynni yn cael eu trafod yn rhan o'r broses gymeradwyo. O ran annog adeiladwyr lleol, rhoddodd y Cyfarwyddwr materion Ffyniant a Datblygu wybod bod Grantiau Eiddo Gwag bellach yn cynnig cyfle i gael arian ychwanegol ar gyfer prosiectau Effeithlonrwydd Ynni a Phaneli Solar. Bydd yr adolygiad o'r CDLI hefyd yn rhoi cyfle i drafod mesurau effeithlonrwydd ynni. Pwysleisiodd y Pennaeth Lleihau Carbon fod y strategaeth ddatgarboneiddio yn cael ei defnyddio i ddatgarboneiddio ôl-troed carbon y Cyngor a bod y Cynllun Ynni Ardal Leol yn berthnasol wrth edrych ar ardal ehangach y Fwrdeistref Sirol. Nodwyd bod y cynllun yn cael ei ddatblygu ar hyn o bryd ac mae disgwyl i'r cynllun gael ei gwblhau erbyn mis Mai y flwyddyn nesaf. Bydd y cynllun yn cynnig cipolwg o sut mae modd annog gweddill y Fwrdeistref Sirol i ddatgarboneiddio.

Cyfeiriodd Cyfarwyddwr Eiddo'r Cyngor at yr arbedion sy'n deillio o'r Paneli Solar gan nodi bod y Cyngor yn cynhyrchu dros £120,000 y flwyddyn o ganlyniad i Dariffau Cyflenwi Trydan.

Yn dilyn trafodaeth, **PENDERFYNODD** Aelodau:

- i. Cefnogi gwaith gweithredu a chyflawni Strategaeth Ddatgarboneiddio Gorfforaethol y Cyngor a'r Cynllun Gweithredu; a
- ii. Derbyn diweddariadau pellach a chostau wedi'u diweddarau yn dilyn cynnydd pellach.

### **31 Materion Brys**

Doedd dim mater brys i'w drafod.

### **32 Adolygiad y Cadeirydd a dod â'r cyfarfod i ben**

Dymunodd y Cadeirydd ddiolch i bawb am ddod i'r cyfarfod a dymunodd Nadolig Llawn a Blwyddyn Newydd Dda i bawb.